

Helen Lejuez

Helen Lejuez (62) semper tabata un persona cu ambicion pa supera su mes, pero a nace den un epoca na Aruba unda e aspiracion mas grandi un hende muhe por tabata pa dirigi su propio famia y si e tin ambicion profesional, ta e secretaria mas eficiente cu tin. Na prome instante, Helen tabata sigui e tendencia aki. El a casa na edad jong, a bai biba na Spaña un tempo, y despues di a bolbe Aruba a traha na varios luga como Directie Secretaresse, entre otro na Lago. Pero, e mama hoben tabatin e inquietud pa sigui supera su mes. *"Semper mi tabata kier a sigui studia."* Y ora cu a bin e oportunidad pa studia ley na Universidad di Antiyas, Helen a tum'e tambe. Ley tabata locual tabata atrae semper, y e mes ta kere cu esaki ta influencia di su tata, kende tabata inculca den su yiunan e consciencia di regla y disciplina. Y ta e disciplina cu a bin na bon pa Helen por a sigui e estudio, dirigi e negoshi cu e tabatin e momento ey, y mas importante cuida su yiunan na mesun momento. Pasobra e proceso no tabata facil. E tabata ensera tuma avion regularmente pa Corsow pa bay les, y bolbe e mesun dia pa percura cu e muchanan a haci nan huiswerk y haya e atencion necesario. *"E tabata un cansancio, pasobra mi tabatin mi famia y mi mesun negoshi."* Su motivacion? *"Sobrevivencia."* Y su yiunan a compronde cu nan mama mester a tuma tempo pa studia. Nan tabata pasa nan tempo cu ne, den camber ora e mester studia y nan mes, hasta na edad di tres aña tabata bisa nan amiguitonan cu mester keda keto ya cu *"shhh...mi mama mester studia."*

Ministerio Publico a cumunza haci e yamada

Apesar di e tur e sacrificio, incluso e dianan di fiesta manera Aña Nobo ya cu tentamen tabata sigui mesora, Helen a persevera. Pa cuater aña el a laga entretinimento un banda pa cumpli cu su mision, esta gradua como hurista sin laga su yiunan un banda, y sin faya un solo examen. *"Mi a pasa den un solo biaha te hasta pa 'belastingrecht' cu tabata esun mas dificil pami. Ora cu mi a haya un 6 pa e examen, mi tabata sinti asina bon."* Helen a corda na harimento. E unico pausa cu el a tuma tabata na final di su estudio, ora cu su mama a fayece na e mesun momento cu matrimonio a kibra. Helen a haci uzo di e tempo pa scirbi su tesis final y 6 luna

25 aña para firme como Huez, Fiscal y abogado

E prome fiscal femenino di Antiyas Hulandes y Aruba no a haya e caminda dorna cu petal di flor, al contrario. Helen Lejuez mester a bringa pa cada caso, specialmente pa muestra su determinacion cu disciplina y integridad ta keda e elementonan di guia, tanto personal como profesional.

despues, e tabatin su titulo di Meester in de Rechten.

Su determinacion no a keda sin haya atencion di un di e profesornan na Universidad di Antiyas. Dr. Jaime Saleh no solamente tabata duna les, pero e tabata Presidente di Corte tambe y a mira potencial den Helen Lejuez pa sea bira huez of bira fiscal.

Tabata Saleh cu a sugeri Lejuez pa sigui e curso pa huez of fiscal mientras cu e ta traha, esta e asina yama raio. Tabatin un complicacion, pa motibo cu 25 aña pasa Helen ya a pasa 30 aña, y entretanto tabata divorcia, dos punto cu lo a haci su aplicacion pa raio imposible. Sinembargo Jaime Saleh a considera Helen suficientemente cualifica pa e por

sigui e preparacion y a dicidi cu e hurista Arubiano mester sigui raio. Helen di otro banda tabatin su mesun pensamiento y cu e influencia militar di su tata den dje, a scohe pa traha den Ministerio Publico, pero na Aruba. Asina Helen Lejuez a bira e prome hende muhe cu a dreña Ministerio Publico na Aruba.

Polis a accepta e prome fiscal femenino

Y su huramentacion tambe tabata algo unico. No pasobra e tabata e prome hende muhe pa huramenta como fiscal na Aruba, sino tambe pasobra un detenido durante un caso a didici pa manda un stoel riba huez. *"Un prisionero a ataca huez y fiscal e tempo ey, y Procurado Gen-*

eral a bisa mesora pa mi no spanta." Kizas e incidente aki cu a haya hopi atencion den prensa na Aruba tabata un indicacion di con e carera di Helen Lejuez lo ta den transcurso di 25 aña. Pa cumunza, pa miembronan di Cuerpo Policial di Aruba e hecho cu nan mester a traha cu un fiscal femenino tabata algo nobo, pero ningun momento Lejuez a sinti cu nan a rechaz'e. *"E tabata pret pa mira cu mi tabata atende un caso, anto polisnan tabata bisa mi cu mi no por ta na e sitio. Te ora cu mi a bisa nan cu ami ta e fiscal."* Pero e abogado ta satisfecho pa e hecho con polis a accept'e, specialmente despues cu nan a pon'e pasa test, manera su prome autopsia. *"Bo tin cu bisa bo mes cu bo no ta bay flaww ora nan ta habri e hende, pasobra e polisnan ta wak*

y nan lo hari bo. Mi a dicidi pa mi mes, cu e proceso ta manera un les di biología, y asina mi por a wanta e imagen y holor stinki cu e proceso ta trece cu ne." Y su siguiente paso, tabata dreña cu paña y tur den un piscina pa purba kita e holor.

Pa su yiunan e tabata un aventura, y cada biaha cu telefon ring den marduga, nan tabata cla pa bula den auto y bay cu nan mama, algo cu no por a tuma luga sin mas. Pero, pa e mesun yiunan aki, e bida na cas tabata marca pa regla y disciplina.

Un fiscal mester ta husto y traha cu respet

Helen Lejuez ta contento pa e forma con Ministerio Publico na Aruba a accept'e. El a bay traha e tempo ey bou

Mr. Florencio Wernet, su compañero di estudio, kende segun Helen mes *"tabata un hopi bon mentor pami."*

Pa Helen, e trabou na Ministerio Publico tabata un experiencia unico. E no a tuma ningun caso personal, ya cu den hopi ocasion mester a persigui hasta personanan yega, manera famia. Pero, e no tabatin problema pa a haci tal. *"Si ami haci algo fout mayan mi tambe ta responsabel pa loke mi a haci, mescos cu tur hende."* Y e rectitud aki tabata refleha den su bida diario tambe, incluso tabata pone un peso riba su yiunan, cu no tabata permiti ningun 'short cut.' *"Mi yiunan tabata bisa mi cu mi tabata hopi streng,"* Lejuez ta conta.

Pero e hecho di ta stricto no ta nifica cu Helen Lejuez, e fiscal, no tabata husto. Al contrario, varios hende cu a keda condena despues a gradici e fiscal pa a yuda nan bay bek den e bon caminda. *"Mi ta haya hopi tristo di mira, na mi parecer, cu fiscalnan no tur ora ta trata hende cu berdad a comete un error, na un forma corecto. Aunke cu un hende por a haci un fout, esey no ta kita cu e ta keda un hende. Mi tin cu controla bo, mi tin cu sera bo, pero mi no por perde respet pa bo."*

Abogacia y Corte

Despues di a traha dos aña como fiscal, Helen Lejuez a dicidi pa uni na e bufete di abogado Maduro. Pero e mester a interumpi su trabou pa motibo di tratamiento medico na Hulanda, pa su cuero. Aunke cu e consejo tabata pa e keda biba na Hulanda, Helen no por a resisti e petition di Procurado General Wernet pa e bolbe Aruba pa reforza Ministerio Publico di Aruba un biaha mas. E intencion tabata pa Helen asumi e puesto di Abogado General, cual puesto tabata vacante. Pero finalmente Gobierno a dicidi pa no nombra un AG. Asina mes, como asistente di Procurado General, Helen a trata casonan hopi interesante, manera e extradicion di Carlos Triana. *"Pa mi e tabata un reto, pasobra mi mester a trata cu diferente pais manera Merca, Francia."*

Sinembargo, Helen kier a sigui crece y sin e posibilidad pa bira AG, el a responde na e invitation di Jaime Saleh pa bira huez, y aki e hurista Arubiano a dreña otro fase den su carera, bou guia di dos huez cu el a apreciar masha hopi cu ta Mr. LaFleur y